

四庫全書

集部

欽定四庫全書

集部

白雲集卷二

詳校官中書臣徐志晉

侍讀臣孫球覆勘

總校官知縣臣楊懋珩

校對官待詔臣胡士震

謄錄監生臣葉中桂

欽定四庫全書

集部五

白雲集

別集類四元

提要

臣等謹案白雲集四卷元許謙撰謙字益之號白雲婺源人事迹具元史儒學傳謙雖從金履祥游講明道學然其詩理趣之中頗含興象五言古體尤諧雅音非擊壤集一派惟涉理路者比文亦醇古無宋人語錄之氣猶

講學家之兼擅文章者也惟與王申伯一詩
宗旨入於莊老非儒者所宜言求補儒吏一
書代人干乞亦可不必編置集中為有道之
累至於南城晚望詩乃五言長律八韻而誤
分為二首放棹行乃七言古詩而誤以為律
體故朝散大夫婺州路總管治中致仕朱公
壙志末稱孤子某等泣血謹識全篇皆子為
父作之詞乃他人之文誤為收入題趙昌甫

詩卷實七言絕句一首題下昌甫以辛丑歲
云云即詩之序乃誤入雜著中學箴一篇既
據謙手迹收入集中即當題曰補遺乃別共
明人題跋題曰附錄考卷末舊跋是集乃正
統丁卯金臺李伸得殘編於其祖妣王氏家
皆謙之草稿伸始編次成書非出于謙所自
定故體例踳駁如是也成化丙戌江浦張瑄
初刻于廣東金華陳相為之序又有正德戊

寅陳綱重刻跋稱脫去數頁竟不可得又稱
改其名曰白雲存稿此本從商邱宋聲家轉
寫仍題曰許白雲集亦無缺頁觀卷末題識
蓋此跋從別本錄入故與書不相應今亦削
之不載云乾隆四十六年十月恭校上

總纂官

臣紀昀

臣陸錫熊

臣孫士毅

總校官

臣

陸費墀

白雲集原序

吾婺道學之傳自宋東萊呂成公以身任其道倡鳴於南渡之後卓乎不可及已元有仁山金文安公以其傳於北山何文定公魯齋王文憲公者而傳之白雲許文懿公蓋北山得於勉齋黃氏而勉齋實出考亭朱子之門故傳得其正粹然以道名家他如待制浦陽柳公侍講烏傷黃公禮部蘭溪吳公翰林東陽張公以及國朝學士景濂宋公待制子充王公皆以斯文羽翼其道者

也海內論鄉學淵源之懿師友繼承之篤蓋莫如吾婺而吾婺晚生後學一何繼承之寥寥哉蓋嘗讀其文則亦知其道矣近吾忝第賢科拜憲職出巡東廣偶與方伯江浦張公論事之暇談及吾婺在昔理學之盛忽袖出許公白雲集寫本四卷見示且曰欲刻之未能予得之昕夕莊誦殆忘寢食儼乎身登其門聆其誨而嘆親炙之罔及也因節廩食之餘助方伯公購梓刻之庠舍以嘉惠來學方伯公謂予宜有序因竊嘆曰昔許公嘗

云君子之身存而其道之行不行者天也身亡而其書
之傳不傳者人也夫書之傳即其道之行今許公身雖
沒已踰百年而一旦賴方伯公出其遺書以行于世使
來學知所敬承豈非待其人而傳乎敢以此僭引諸篇
端成化二年歲次丙戌春正月既望後學金華陳相序

欽定四庫全書



原序

元史載白雲先生行實

元順帝至元三年冬十月金華處士許謙卒初謙聞仁山金履祥講道蘭江上委已而學焉履祥曰士之為學若五味之在和醯鹽既加則酸醎頗異子來見我已三日而猶夫人也豈吾之學無以感發于子耶謙聞之惕然時履祥年七十而謙年三十有一矣履祥嘗告之曰吾儒之學理一而分殊理不患其不一所難者分殊耳謙由是致其辨于分之殊而要其歸于理之一又曰聖

人之道中而已矣謙由是事事求夫中者而用之履祥
既沒謙益肆克闡多所自得自謂吾非有大過人惟為
學之功無間斷耳謙制行甚嚴而所以應世者不膠于
古不流于俗介而不矯通而不隨身在草萊心存當世
素志冲淡以道自樂浙東憲府聞謙名而不察其志辟
以為掾避弗就肅政廉訪使劉公庭直舉茂才異等副
使趙公宏偉舉遺逸亦皆固辭趙宏偉在南臺命除舍
館迎致謙將使衆僚多士有所矜式謙欣然為之起而

不久留也謙既東還以目青倦于應接屏迹入華山中
學者翕然籛糧笥書而從居再歲以兄子喪而歸戶屨
尤多遠而幽冀齊魯近而荆揚吳越皆百舍重趼而至
謙之教以五性人倫為本以開明心術變化氣質為先
以為己為立心之要以分辨義利為處事之制至誠諄
悉內外殫盡嘗曰己或有知使人亦知之豈不快哉或
有所問難而辭不能自達則為之言其所欲言而解其
所惑討論講貫終日無倦攝其粗疎入于密微聞者方

傾耳聽受而其出愈直切憤者作之銳者抑之拘者開之放者約之為學者師垂四十年著錄迨千餘人隨其才分咸有所得達官富人之子望閭而驕氣自消踐庭而禮容自飭四方之士以不及門為耻縉紳先生至于是邦必即其家存問焉謙素多疾先是金履祥病革徒步往省之會大雪中寒濕及奔兄璟喪於廣信病增劇不良于行疾少間而神更清茂至是疾復作謂其子元曰伯兄以是月二十三卒我死殆與之同日乎及是日

正衣冠而坐戒元以孝于母友于弟元復請所欲言謙
曰吾平日訓爾多矣至此復何言門人朱震亨進曰先
生視稍偏矣謙更肅容端視頃之視微瞑遂卒年六十
八門人以義制服者若干人因其自號題其墓曰白雲
先生謙字益之所著有讀四書叢說二十卷詩名物鈔
八卷讀書傳叢說六卷觀史治忽幾微若干卷皆行于
世謚曰文懿

義烏黃氏潛曰聖賢不作師道久廢逮二程子起

而倡聖學以淑諸人朱子又邇流窮源折衷羣言而統一由是師道大脩文定何公基既得文公朱子之傳于其高弟文肅黃公幹而文憲王公柏于文定則師友之文安金公履祥又學于文憲而及登文定之門者也三先生發人學者推原統緒必以三先生為朱子之傳適文懿許公出于三先生之鄉克任其承傳之重三先生之學卒以大顯于世然則程子之道得朱子而復明朱子之道至許

公而益尊文懿許公之功大矣

--	--	--	--	--	--	--	--	--

欽定四庫全書

白雲集卷一

元許謙撰

四言古詩

白鳥

申辰六月十一日

僕屏居陋巷一旦棟撓讀鷓鴣二章而有感因賦白鳥以自況

有白斯鳥生于林臯棲棲骨格翯翯羽毛母兮天方匪鷓鴣伊鷓鴣含哺忘恃哀鳴喅喅

磬磬哀鳴遷于灌木豈無好逌敦彼獨宿渴飲而泉飢
啄而粟聊樂我員亦曷云足

飄風自南霖雨既淫鱗斷山拔龍興海吟墮卵覆巢林
莫我深翅翕罔舉口禁若瘖

熒熒明星上麗于漢泛泛行舟亦達于岸維此好鳥所
止泮奭控地決飛鷦鷯斤鷗

鴻雁在渚鵲鵲在原物以羣分維性是便爾鳴雛雛爾
懷急難無胥遠矣今亶其然

朝陽爰飛夕月唳止嗟彼燕雀厥志焉擬何天之衢側
目萬里扶搖一冲時之俟矣

欝松贈陶思齊任通波驛長

欝欝喬松在彼中林斷之礮之以榱以楹我材既良胡
寧靡成日居月諸亦迭而逝謀猶孔臧庶拔斯萃奮然
于懷耿耿寤寐泛彼柏舟集于西流征夫遑遑予取予
求爾言毋暴我心則休遥遥道途跬步斯舉悠悠天衢
始振其羽聿其問津雲漢之渚

松澗

頌趙治
書自號

挺挺長松色正氣雄風雨霜露無能動容直幹摩空雲
中之龍泠泠幽澗泉流石粲甘則可掬寒不可玩孰云
在山為江為漢維松之貞倚澗之清維德維用相須以
成君子似之克彰厥名豈維棟梁苓珀千歲豈維澄源
潤物平施盡其大全始出乎類秉心塞淵有緝其光本
源之盛枝派乃長子孫繩繩既壽且昌

五言古詩

王申伯和此詩不會予意其言甚悲余心少之又
作以終其說

壽夭齊彭殤逍遙等鵬鷃心室理未融役役空曠眩得
志鄙懷題窮簷樂原憲道在體自胖奚必萬間羨天地
一穹廬何適非所便廓然居安宅怡然觀物幻老聃亦
達人以身為大患誰謂杜陵翁乃有茅屋嘆

上李照磨四首

道原出于天合變無終窮羣經載道器言異理則同民

生有物則所要求厥中先幾在知止實踐乃聖功心廣體自胖萬象皆春融寧為四寸學坐想成玄空

濂溪振遺響伊洛探玄旨龜山載道南江漢隔萬里乾淳號鄒魯三子森鼎峙皇圖啓昌運寰海共文軌得人道乃弘今古無不爾殊途固同歸遐邇均一視

中原清淑氣世代生偉人伯陽孔子師千載今雲孫窮經入閩奧探道提綱綸襟懷灑秋月論議開愚昏大材古難用暫屈寧久伸要當推所學利澤均斯民

東南互鄉子古道昔所慕悠悠三十年所向皆謬誤私
淑得碩師引發使自趣鞭繩屢提掣遠道迷蹇步緬懷
天下士一覩快披霧掘衣登公堂隅坐視朝暮

酬潘明之

鴻鵠凌霄霄燕雀巢白屋凌霄志寥廓巢屋亦云足故
人眇天涯歲月如轉燭昔為交手歡今成斷腸曲蒿華
日以高江漢日以卑道異謀不同何日傷別離書成情
未盡路遠夢更迷相思溪水頭猶如送君時

贈禽演周梅鼎

星翁術多岐禽學出最晚舊云南陽公格物明萬變天
經環陬維隱見易昏旦大化運甄陶衆彙歸治鍛人生
囿烝中安能外長算周生儒家流心學理已貫羅縷角
與根捷若緒抽繭謂我四十年始晦終且顯我生逢百
憂子語堪一莞聖賢不言命言命固已淺富貴安可求
有義當自勉子今方壯年所志在高遠挾此任所之侯
門有青眼

觀水

江源可濫觴萬里會流派海鉅莫能量有容德乃大

寺中有蔣身卿索詩即席贈

豫章吟悲風古刹響哀梵空谷厭劫塵涅槃成一沔平生友于情一夕嗟夢幻升堂哭遺像退坐起長嘆誰歟身卿翁儒雅閭里冠屢出文字語聊復解悲惋對床聽風雨咄咄夜達旦月落雞三號誰歌白石爛

題曹提領湘靈廟聞樂見燈詩卷

重華陟遐方馬斃車折軸娥英失所天往殉行且哭聲
凝衡山雲汨染湘江竹夫君不可見異穴嘆同穀廟食
三千年境土惠徼福事久竟忘哀幻化驚耳目音響鈞
天和光景清夜燭曹公駭聞見三月食忘肉簫韶久已
絕豈假湘靈續誰能寫新聲如彼涓在濮尚憶開元君
能傳羽衣曲

遣興十首

光景何匆匆志意空曼曼百年能幾滿歲月條將半起

坐夜嚮晨何由夢公旦中流樹砥石湍激從汗漫未迴
南楚轅徒起北門嘆

秋日常苦短秋夜不可闌葉鳴迅風晚蟲怨零露寒月
白天炯炯振衣起盤桓山川出浮滓翳彼明不完幽興
中道絕百感來無端何當誅豐隆致身無羽翰清光亦
何私不照方寸丹

少年學老農旦暮言耘耔種深本難拔糞力易生滋良
苗勿堰長惡草煩芟夷天時互豐歉人事更扶持功備

待日至厚斂非所期豈必務廣得地力窮鉷基惜哉無
負郭稼穡寧不知

猗猗澧有蘭馥馥沅有芷獵獵石上蒲泛泛水中芰鮮
鮮三徑菊旒旒百畝蕙采掇集衆芳燦爛成雜佩佩服
何所從將以待君子

東家有處子二十不踰閭婉婉聽姆言將欲備四德錦
機織迴文字古人莫識蘭麝熏衣裳閨闈謹容飾良人
仰終身寧不慎所適膏沐豈為人自修女子職

蓬生衆麻中不扶能自直寒窻效蠅鑽孤陋寡聞識古
來貴尚友萬善在熏炙古人不可見今人豈易得千載
遙相思空使我心惻相思令人瘦相思令人老人瘦尚
可肥老大徒自悲

淵明千載人皚皚瑚璉器世醉不可醒杯酌聊卒歲高
風起廉隅終古誰足跂聖人道中庸用舍由禮義甘心
事麴蘖沈湎祇自穢樂生亦知言名教有樂地

拾金復擲金爭如鉏不顧子魚惡能廉強制情已露向

非迫畏友晝攫亦何懼平生有心事狼籍見遲暮經德
安可回所復在平素

春風榮衆芳秋露悴百草羲和策日月疾急兩飛鳥枯
桑號天風俛仰波浩渺氣流物隨化金石不自保人生
寄蜉蝣時邁胡不老天地有終窮微眇何足道

乾坤無停運清氣日夜生人居覆載間所息能不萌握
機養天和持守如捧盈得喪固有命寵辱何足驚一身
磐石重萬鍾浮雲輕丈夫有志願誰謂吾無成

送蕭仲堅隨伯兄赴江陰三首

朔風集飛霰歲月倏云已芸芸萬物機亦各復根柢胡
為北征雁一舉成千里澄川稻梁肥雲水渺難涖靜集
鳴相和允為得所止

紫陽有遺書秘啟天地根描模失真趣議論徒紜紜仁
翁繼的緒夢奠嗟不存臯比淑至道與子昔屢聞要在
足目到言語何足云

交際須得人市道亦何益張陳古英士豈不重金石一

為利所移德怨易旦夕輔仁可無友獨學終固僻唯應
鮑叔賢俛仰嘆陳迹

次韻志懷

丙午

朔風漠沙白瘴日越荔丹出門萬里道爭似二頃田拜
塵素所薄知命復何言鄙夫競聲利石火寒無烟清風
桐江水捷徑終南山丈夫時用舍所貴無泚顏得喪固
一瞬芳臭俱百年坦途有覆轍窮哭誰復憐乾坤渺無
際我身蝨其間浩氣貫元化漸著豈不闕見可乃合道

行險祇自殘平生作霖志詎肯懷土安風雲有嘉會時
至庸何難君看激海鵬振羽青霄端

次韻木冰

正月

堯甸九載水商郊七年晴災祥氣所致治世何重輕方
春時始和嘉樹條垂冰霰飛集杞柳雨溜凝松楸脩銀
奮龍爪圓玉剗蛟睛怪招越犬吠寒起巴猿憎交薄繁
精瑩眯目一色盈虛牝激爽籟木杪琳琅聲上天命靡
謏怨咨非由人餘寒自凝沍生意中敷榮殷雷發丙夜

羣蟄豈不伸渾淪幹大化竅妙未易明允矣理昭昭誰
歟視昏昏元元繼無息乃見天地心運行氣適迂變見
成稷氛勾芒職木正歷日甫及旬聖人體天道尚德不
尚刑木冰紀麟筆竹帛垂魯庭王正今再書徵古聊慰
心咎夔集天衢秉令如雷霆仁風動六合趨走星火奔
支離可攘臂暖日脂車輪東郊滿芳草載驅適我情胸
中勿芥蒂官府如冰清

次韻景文杭州見寄四首

窮通豈人為有命在彼蒼索居際良會晴日消寒霜內
求德乃備粹玉先光芒古友安可尚千載空相望

茂陵智哲翁多欲不自知少君與五利荒誕夫何疑大
藥可立成篤信猶兒癡屢失求愈切至令今人嗤神方
苟可得我輩何憚為

我生逢不辰知學況遲暮猥器抱謏聞達者肯一顧榆
陰得先覺知我乃有素冠佩參翱翔鞭策多驚悟孤山
有寒梅清質不受汙遺我長相思誠以夙夜故久交竟

不忘相勗言愈苦自憐春絮狂風雨漬泥土

自卑志易荒勇鼓氣乃倍富貴倘固有鼎味終染指蓋
棺事方定禍福可預計譬彼陰陽流屈伸理相繼豈不
為身謀風波有危事安能鑿三窟詭道收薛貴

贈金月華

歲丁亢偏陽祆魃肆大厲不雨更八旬赤地且千里卧
龍樂寒淵雷電驅不起泉枯土山焦地墳名木死顧茲
咫尺苗秀實何所恃豈惟生怨咨溝壑有老稚月華探

道窟陽雨能力致從人預為期膏澤應時至人心與禾
稼蘇息兆生意胡為天瓢慳長風捲晴霽願君再作霖
歲事斯可濟

贈江行父四首

有朋遠方來傾蓋語已契紛紛燕雀間聽此孤鶴唳中
局湛淵水窺測渺無際接人氣雖和自律言頗厲為言
君子交相與期晚歲珠玉生光輝顧我形頗穢

康莊多風塵窮巷絕車轍慷慨感前修探索心屢竭干

將鼓洪鑪不化凡冶鐵太山萬仞高企足藉丘垤意長
時苦短回首暮光滅

海為百川歸流派各有源清濁豈不異皆可觀其瀾威
儀動三千意象非一端要知霄壤隔乃在毫釐間畢公
勤小物垂訓古不刊

子抱經濟具我有丘壑情半生猶滔滔兩鬢俄星星林
間十畝地坐笑觀枯榮白雲與流水無心誰能爭君看
歧路多執轡慎勿輕奮策當坦途毋使侵榛荆

送高經歷八首

清風振千古警省懦與頑
瑩瑩柱石磊盍置廊廟間
江
南山水窟適意聊盤桓
故園松柏思轅駕孰可攀
鳳池
有所待驥足那得閒

世南行秘書孝先五經笥
上下千載間網羅無遺事
高
談驚座客揮麈發精義
困泉浩晝夜混混達原委
鰕生
時摳衣一見心已醉

芙蓉泛綠水優游東海瀕
天風一披拂七郡涵餘芬
行

人思驄馬辟易清路塵魑魅凜秋霜民物熙陽春甘棠
有佳蔭雙檜長輪囷

膺門賢可登融座客常滿文章有小技揚善棄所短何
地不生材文木雜櫟散免為爨下薪匠石曾一莞匪謂
成棟梁時人已青眼

少年苦跋涉中歲頗悅道秋霜苗未實播根恨不早乾
坤眇無際至理日探討蒙頭愧種種羲娥復佻巧誰能
分刀圭使我長不老

昔年黃叔度量若干頃陂一時英俊人那敢輕牛醫終
南多隱士捷徑肆罔欺承禎亦高識至今人所嗤君子
病無能何患不已知

簡珠混泥沙賢否未易別緬懷貞白姿飾外祇自潔蹄
涔生寸波一勺固已竭燕石擅美名和璧正遼絕每聆
許與辭愧汗幾耳熱

綱紀需碩材曹掾非冗食胡為鄉校選乃及山林迹蠅
營非素願蝟縮已成癖南州徐孺子不愛公府辟亦感

際會恩終身以為德

孔衍聖幼年能書大字以女妻之

玉樹生階庭英材挺天秀九齡書大字學業日已富東
床有妙選嘉耦聖人曹洙泗後因源力積乃能究勉哉
南宮容白日不可又

趙天樂見示所著詩歌因賦短句奉贈

神人栖三山嘯吸備六氣表裏冰雪清欬唾珠玉瑞先
生天下士逸氣欲蓋世糠粃玄端衣珍重紫霞帔手挾

雲漢章道啟天地秘喬期眇何許心遠神與會脫略塵
俗語寧識烟火味大篇富而溫短什清且麗瞥見眼為
明三復心已醉大道貴玄默名教資論議損之至無為
立言無乃累緬懷赤松遊泉石形夢寐窮巷守環堵扣
戶時問字直欲外形軀烟嵐挹空翠至寶勿發揚固塞
歸一致胡為尚嘖嘖彞典敢無畏

遊山一首

九月十八日訪疎寮于盤溪偕趙肅夫及其子

璉何仲英先行遯山策蹇馬追及拜北山遺像
夜宴座中楊舜舉善滑稽與遯山應酬不倦夜
半羅蘭似辭歸

霜風搖疎林木葉翳荒徑烟開山色明日出天宇淨行
同二三友緩步入幽窅亦有童冠從彷彿春服盛後期
策駑駘蹇足心還寧峰回路幾折晚轡逢石磴主人雅
敬客一嘯出相迎門庭對虛廓約略壓澄瑩緬懷百年
人嘉遯樂天命盤溪異莘野王帛謝三聘升堂拜遺像

生氣凜可敬，睥睨神欲交。
鑽仰心不競，猶餘滿案書。
鉛槧精考訂，昌哉賢子孫。
對客且涵泳，須臾肆華筵。
列坐以齒定，肴核豐且邊。
魚肉富盤飴，勸酬逾十觴。
壘滿餅，肯罄劇談屢。
絕倒隱語若響應，醉客騎馬閒。
夜久奎已正，鋪床對窓月。
樹近影交映，見聞絕囂塵。
夢境亦清興，曉起還看雲。
此樂殊未竟。

贈潁川趙璉十九首

有序

潁川趙璉從子遊逾二載，復日夜坐草亭，考索理義，始

至大辛亥十月癸未至皇慶壬子五月癸丑而止誦講之
餘相與步武庭中倚樹凝立仰觀俯察莫匪佳趣間
以所見輯成韻語得十餘篇于璉之行書以贈之
明星懸樹端白月在戶外坐覺羣響空默與萬象對化
流滿寥廓境寂得清粹涼風颯然來動物各有態人涵
天地心此意有誰會

鴻雁西南翔清叫哀夜月長風吹羽翰日短影孤滅美
人渺天涯恩書中道絕欲成新合歡豈願長契濶有力

日可追有志山可移所思勿棄置亦有相逢時

北風吹庭樹顏色日慘烈豈必驗枝條根株意寧絕
然作春榮所養在消歇苟非終夜存膏盡火隨滅

風霜門外多爐炭室中暖欣此清夜永任彼寒日短
浮塵自憧憧五色分過眼靜極樂則生窮陰見剛反

雨來鳴四簷擊柝聲忽五捲書成燕坐繼燭且晤語
誰能理枕衾聊復議今古彼哉心不存清響乃愁緒

寒梅五樹花粲粲仙子蒐毘吾切玉刀鏤刻無纖痕
潔

清最所敬況復揚清芬窮陰塞宇宙微陽抱孤根
羣林正僵立生氣獨若神後塵殿兒女朱紫何紛紜
草居疾風下偃非可倫人能我則效尋丈徒云云

浚深及寒泉圓甃涵老瓦泓然出清泠修綆木巽下未
能極甘冽聊亦濟九夏漂泥窮根源引汲復誰捨

角尾備龍形奎參陳虎迹玄龜東矯首赤鳥南奮翼垣
墻限異居列首各有職昏晦明冬夜赤烈乃夏日紛張
若無序四向皆拱極錯綜固萬殊至理本歸一

朔風厲中宵灑牖聲瑟瑟推簾有奇觀上下銀一色秉
燭處虛簷呈巧猶六出春回日未多到地亦瑞物鏤玉
不受塵貞質天下白願言潔其身視此以為雪

營營晝陰遄膏火繼不足碾磨豈苟苟厭此春漏促發
端未終竟落日亦已速更宜坐須臾無負數寸燭

晨雞催我眠春鳥呼我起無端促更籌酣寢非所喜古
道迷荆榛本來直如矢剪除須累工寧可旦夕俟

百草生階庭蕪穢苦不治紛拏亂人思日夕事嫖薙或

云勿剪除交翠總生意物具理即存觀者安能泥苟能
探中和所在達原委

好鳥鳴春林出入百如意人能脫卑汙卓爾忘物累盤
錯雖紛綸百慮歸一致萬變攻我心所秉元有義

宵漏四十餘疾急不可駐役夫昧昏夜戍柝迷夙莫商
頌歌悠揚未足發歸趣竹徑流疎螢蕉葉瀉清露咿咿
遠雞鳴蠅聲無乃誤

雲行竟太虛澍雨溉下土豈惟稻與梁餘潤及草莽一

物失沾濡厥施猶未溥大鈞陶萬彙寧復間爾汝用之
盡吾仁先後宜有序

美材非不多礱斲有所待爾生能清淑如白可受采靈
明螢照夜汗滓波翻海精探復力脩歲月德可改罔念
固作狂勉勉敬與怠

朋從固有道聚散亦有期不遠千里來荏苒踰再期豈
惟窮訓詁亦復語顯微愛子量可容愧我無所施

大達雖九達捷徑嫌多歧剛明履中正君子貴自持我

亦觀爾成豈忍言別離尚須勤寄書慰我旦暮思

送李榮甫知事遷淮西三首

長松生岡陵質與風木異春和猶凜然況處風霜地塵
埃飛六月豈足為我穢一雨洗蒼蒼凌空氣尤厲
峩峩惠文冠所任在鷹擊立仗或不鳴首尾較得失民
風已澆漓得情良可惻尚須一分寬但勿踰限闕
淮水出桐柏浙江發東陽期會至滄海千里遙相望源
澄撓不濁水得固可量願將此清泠溥施彼一方

送姜君澤赴浦江縣教

儒生鮮明經地芥拾青紫今古不同途
進取頗殊軌尚餘庠序師亦藉文學士
彬彬渭川人自誠聊復爾時猶困積薪
世乃收苦李浦陽隔山雲相望踰百里
首宿富朝盤芹藻動秋水振鐸揚教聲
衿佩若歸市買骨天馬來寧假終日俟
倘遇玄英翁問訊今何似

牧牛圖

木葉紅欲落野草青未枯健犢喜跳踉
脫梏行江隅牧

人善防閑為擇牧與芻母牛徐掉尾煦嫗鳴相呼阿童
得所托靜中樂華胥豈惟置蓑笠乾坤一蘧蔭苟能物
付物拱默堪如愚

孔濤巨源携八世祖中丞擊蛇槐笏求詩

茫茫宇宙間一氣陶庶彙流行有天常偏駁乃為沴惟
人萬物靈順正補其弊所以致中和能使天地位中州
際明時和氣興善治偏成或湮鬱逮彼西北裔神人糅
雜居詛盟成蠱媚怪虺據琳宮奔走傳詭異潔牲祀朝

夕牧守率羣吏孔公聖人胄天質抱剛毅直養氣已充
平素有集義憐彼鰥人愚惡此醜物厲抽笏奮而前一
擊首隨碎壯心發陽剛排斥陰險類諒茲咫尺簡寧比
劍戟利敬存勝百邪妖孽何所避遂能格君心蹇蹇居
諫議君家愛甘棠什襲傳八世豈惟子孫珍觀者咸起
畏勿徒寶此傳肖德惟尚志

酬石抹州判六首

熊耳在長源達河入于海滔滔窮晝夜浩浩潤千載游

滓泥不行感嘆歲月改灑然見清冷流派知有在

舉目太華高足疲苦難到剛毅久不渝白刃斯可蹈君
能握要機一蹴已深造振衣千仞岡何適非笑傲

核中自懷仁日夕長根幹扶疎茂枝條本一末盈萬一
葉異顏色元氣已不貫是中毫釐差遽爾生死判竇虧
不成山敬勉何敢玩

大道固如矢多歧亦生疑登天雖無階累土當有基得
才為我才所貴不自欺茫茫萬里途脫轡空驚馳

黔黎多昏蚩無情尚奇詭片言未易直前角後或掎紛
拏雖百端折衷固有理彼有虞芮田荒蕪白雲裏

平生鑄干將未得歐冶訣春臘形粗成一割刃已缺安
得百煉剛發硃光電徹就君乞刀圭為我照凡鐵

送何雲巖

采采泮水芹握手同遊遨重來二十年相對嗟二毛丈
夫當自強豈肯埋蓬蒿子今誠壯遊快楫乘飛濤神州
集英俊諒亦容吾曹良璞宜待賈日夕慎所操

關是

耿耿自晦不可韜飲子白玉卮左手持螯蝦天風吹黃
鶴佇聽鳴九臯

石門洞

清溪護連山雙壁鎖幽洞初登憂徑險小入喜境空木
落猱攫驚叢卑禽鳥弄磴行幾盤折彷彿天籟動蒼崖
倚空碧仰睇石流湫分張山露輕翕聚魯縞重變化熊
萬千敝地風雷閔粵從混沌鑿天造景已貢仙靈擅虛
寂緘閱未忍送賢哉康樂翁為洗塵俗夢胡為百年後

樂與老者共我來屬久晴泉瀉色如凍巒氣噴林薄暍
目作寒霧舟子招我行風疾纜欲縱後期當何時坐對
玉蟬螭

思遠樓

玄樓矗城端簷影墮水涯憑欄對堤草鳴櫓飛浪花舊
聞會昌湖一望十里賒藩籬孰定地相入如犬牙河間
尋丈波僅可通行艤芙蓉已銷落寒水浮枯葭佳景不
及遠興思重咨嗟夫人各有思所異正與邪潮汐蕩瀉

薄鄭衛生淫哇君子善發慮身通心則遐徘徊興未已
古木啼昏鴉

華蓋山

羣山如斗形華蓋氣獨壯奮身地勢高目極天宇曠周
圍萬象澄一一來獻狀中江漾孤嶼瀕海橫疊嶂樓臺
市中居棋列相背向烈風攪蒼林落日鳴白浪蜃氣薄
浮雲溟濛杳東望長濠浸寒水短楫起漁唱同遊豈特
達竟爾忘得喪山下出蒙泉夷坐待清漲一掬襟懷空

自謂羲皇上

中川龍翔興慶寺

孤嶼浮中川晝夜汨潮汐何年地維裂中斷洲渚失兩
峯峙東西蔽影互朝夕浮屠據稜層梵宇絢金碧飛龍
迫風雷曾此一憩息昔時桎梏居今作大士室了師擇
靈地為假蛟鼉窟聚沙合舊港連亘如片石山扉夜無
闌神物便入出亂流携故老一一訪陳迹軒亭倚葭葦
濤浪倚几席豫章號棲風篠蕩翳寒日憑高慨今古天

海相蕩激景在人已非悠悠意何極

暮過東津館

薄暮下東津灘急舟劇箭漁燈互明滅隴月時隱見清
颼從東來涼氣襲我面目送兩山青天長淨如練

遊鍾山至八功德水

悠悠鍾山雲朝夕碍我目褰衣試一往行與雲相逐驅
馬出東門十里至山麓幽人昔已亡誰能繼芳躅猿鶴
乘古林鼯鼯嘯深木彼哉西方人胡為擅斯谷豈云事

幽棲政爾眩華屋泓泉抱何德濁熱供一沃巖回屐欲
倦小憩倚修竹涼颼自披襟佳興亦云足

酬胡古愚三首

扁舟下吳會東看鍾山雲文名久籍籍千里期遇君笑
談屢欵暱所見副所聞襟懷秋水淨氣宇春日溫試看
一鶚舉肯與凡鳥羣瀛洲豈為遠薄言采其芹

乾坤自闔闢文章乃經緯郁郁稱宗周趨下日以敝風
氣有淳漓恒性固無異盡心全此天言語亦餘事修辭

擬盤詰微理猶恐泥美君嗜古學摘藻發清麗源浚流
且長唐虞力能致

秋風迫歸燕宵露泣衰草我留清溪曲君望雙溪道會
合已恨遲睽離奚遽早論心議千古何時一傾倒為我
謝白雲猿鶴故應好

題蔣廟

乾坤孕羣象形鉅氣乃異蒼龍蟠艮維雲雨為物利因
神姓此山依憑兩相濟豈惟托幽靈固亦秉忠義死分

在一時廟食終百世英風久逾彰
邦邑共徼惠豐碑樹松陰圓蘚護
新翠已逼吹帽節來此宜小憩山
光倚空碧耿與秋色對黃花雖未
多聊復成一醉

舟中雜興六首

冉冉江上蘆離離路傍草霜露侵
衣裳何用涉遠道鴻雁方有序孤
飛在林表豈不顧其羣長風翮難
矯

琥珀能拾芥頑鐵亦戀磁人生志
氣合寧獨不似茲道義固可久世
情終易移感應理有常君看雲雨
施寸心

諒匪石懼彼不我知

亭亭嶺上雲玄鶴相與飛俛啄戀故巢不得從雲歸秋
風颺黃葉飄飄各何之羸糧事遠遊在昔聞斷機棲鳥
辭茂林徘徊更依違悠悠兩江水共此明月輝

崑崙萬仞高我欲遊其巔有道固坦蕩茅塞誰使然駕
車審中路力策宜可前子今行幾何進退日月旋上可
顧八表手援咫尺天實理乃真見彷彿誠虛言

嵐烟紫崔嵬波月光滉漾星宿懸虛蓬雲雨暗逸槩震

澤商氣深雄風駕濤浪白鷗與蒼雁來往同簸蕩
吳潮海門濶飛雪噴秋響重重越山迎汨汨溪流上舟
行歷旬日佳景閱萬狀孤征抱結思所感動悽愴安得
同心人詠歌共清賞

釣臺詩

并序

子陵先生抱超世絕俗之姿糠粃世事視萬乘
如一介富貴尚安能淫之乎侯司徒乃欲日暮
自屈語言誠癡語也雖與之素舊豈足窺其際

哉知先生者光武一人耳三聘而起論道故舊
言不及政自儼巢父以明素心光武故怏怏不
能終屈先生則遂其志矣世之論者謂先生以
風節自高而厲當世愚未嘗不以為過也若是
則有為而為之耳夫天之賦于人者有分自聖
人能全其天下是則以其得數之多寡而成性
雖問學漸摩去太甚猶不能反于全先生得天
之清淳澹泊而成性者也鱗潛深淵鳳鳴高岡

安其所遇紛紛遊塵誠不足以挽之不然則光武賢君也少與其學以光武知先生之明先生豈不知光武之可與有為乎以賢人之招而不屈可與有為而不為是矯世立名者豈先生之心哉在庭俊乂各司其局可以守成際時清明足遂高蹈羊裘耕釣樂我天真奚必以汨汨易所性所以縱言不屈率意放禮正欲示不臣之意也至於廉勵漢末興起節義固其高風有

以動之此則仁人利益後世自然之效非先生
素期其如此也某嘗七過釣臺之下而不獲登
皇慶二年十月六日歸自金陵始獲瞻先生之
像于堂因追論先生之志而系以詩

盜莽絕炎運
虐焰煽方熾
英雄各懷忠
韜匿有所遲
真人一呼間
風雲浩無際
浮埃掃妖孽
盤石奠神器
先生淡無欲
耕釣聊避地
俯首千仞岡
一莞羣士戲
故人正九五
樂與共天位
棟梁及桷桷
堂構亦粗備
龍遊白雲

鄉美秦寧受繫事君當盡禮豈不熟茲義胡為夜牀足
加腹罔敬忌年裘有何樂若是志乃遂高節全一時善
利自百世桐江眇舊遊山水貯清氣升堂挹餘風塵心
等蟬蛻

送胡秋白衢州學正

東陽有佳士簪盍鍾山下變文摘風雲論事共樽罍為
言諸孫行二妙皆作者有懷不可見情若江流瀉今此
逢少君秋月澄霽野儒術久不振屏棄如土苴泮林雖

儲材槭棘亂梧櫟固當距詖行扶植歸大雅太末古名
邦生才今豈寡善性水同趨範模待良冶

送敬參政四首

大行亘中州上有千丈松稜稜歲寒節豈惟動春風力
可回萬牛材大古所庸為國作柱石矻矻扶棟隆

秋霜凜清寒忽化作霖雨悠悠潮嶺間草木得其所上
天仁萬物寧獨覆西土旦夕均四方雲行施此普

環堵陳簞瓢頗亦礪清節皇皇駟馬車時委窮巷輟勤

渠義方教誤立門外雪一旦冀北空報德惟自潔
旂旄樹朔風祖道車百兩衆賓對膺舟帆舉纜已放今
宵使星出耿耿魁柄上鵬翼若垂雲楚天眇四望

山中次韻酬馬生

學道如登途進進不可止轍迹每多岐驅策宜審是古
來為已學不怨人不以理義丈夫心聲利兒女喜賦質
雖人殊秉彛固天啟發蒙自得師乃可聞義徙時時受
提命旦旦易聽視不見雄雞冠亦有犁牛子所以先覺

言取友尚論世老魚怯龍門終在萬壑底平生若臨川
無楫莫知濟知濟謬修身俯仰祇自愧馬生勲業冑所
稟當有異青春且努力白日不足恃要須積厚風堪負
大鵬翅我來為山色涉澗漱屐齒歸休旬日間頗奪塵
俗氣胡為浪驚喜松下擁車騎此中無捷徑寧以是心
至學士希聖賢如晦溪晴霽顧子方望洋渺焉莫窺際
擿埴難索途因親宜慎始

採藥

亭亭北山松宿靄陰深碧蒼根走虬龍巨幹蟠鐵石平
生棟梁具不受霜雪厄兔絲得所附裊裊掛千尺流脂
入九地千歲化琥珀我欲掇其英俯仰費搜擿紅鑪轉
丹砂石髓變金液但恐茫昧間圖驥不可索意長時苦
促雙髻日夜白刀圭或可試習習在兩腋蓬萊三萬里
詎謂弱水隔他時在山中故老應不識

贈相士蔣竹山一首

我昔河內家舊有知人名遺書滿天下誰能得其精將

叟從何來自托老門生知我三十年少晦今當明燕頤
侯萬里鳶肩列蓬瀛世無貧賤人安別貴與榮我分已
無聞子言良可驚何以贈子歸妙諭不在形

城東南有虎羣行有司命獵者捕其二以獻三首
陰風曠晴空羣虎不畏逐豈惟牛與羊亦有山婦哭昨
日當道行今作几上肉羣兇未盡去何以慰荼毒
長林肉醉後怒目方負嵎何人奮強弩一矢糜其軀舊
聞裴將軍日斃三十餘何如弘農郡負子不待驅

市人何喧喧縛虎入門闥前驅挾弓矢炳蔚尚光彩操
刀競屠割童稚亦稱快平生百步威狼籍今何在世事
無不然聞者足以戒

種松一首

青松如秧針植在山之蹊豈惟娛心目歲寒以為期未
飽雨露恩那識棟梁姿蓬蒿塞三徑埋沒誰復知秋風
隕百草秀色不少衰雖然咫尺根已見佳種奇君看二
十年腰大數十圍雪霜挺堅操雲漢擎高枝時有白鶴

來凡鳥那堪棲兔絲與凌霄冉冉相附依青松本貞固
不逐衆物移大器固晚成何用嫌暮遲願言堅汝節匪
勉待歲時

對竹一首

主人樹修竹近在桃李場賦性雖不同相友庸何傷陽
春破桃李紅白爭低昂無言自成蹊相媚色與香何心
伴幽獨徒引蝶蜂忙此君心本虛寧逐春風狂咄嗟桃
與李開落那能常

寄友人二首

丹鳳止高岡衆鳥甘戢羽昂昂九臯鶴下上得所附江
南竹實多朝陽自軒翥延頸憂然鳴四顧失其侶豈不
念相從天濶無處所鳳兮歸何時耻與鴻雀伍

主人厭城市愛此林泉居下有石一拳上有松數株念
茲冷淡物可伴憔悴軀所期在晚節俯仰足與娛我心
不可轉比石堅有餘峯頭問長松歲寒知何如

用潘明之韻贈陶思齊一首

黃花狎秋霜正色凌寒柯淵明千載士風流今幾何雲
仍踵芳躅餘子不足多老漁在澗谷尺水無巨波遠遊
有壯志拂劍鍾山阿何當快翱翔為子擊筑歌

又用韻遣興一首

秋山撼虛林秋水揚素波緩衣踞蟠石怡盼庭樹柯芳
景良可惜去日亦已多天寒道路遠奈此兩鬢何興來
勿引酒醉飲空悲歌丈夫志有適慷慨捫太阿

遊里城棲霞寺衆將遷書塾一首

世途眩聲利，倏倏畢昏曉。平生嗜岑寂，夙昔事幽討。束
書扣禪扃，問字來鳥道。豈期猿鶴驚，可厭魑魅嘯。避險
辭窮林，搜竒得遙島。巖巒互起伏，郭郭若環抱。泉深源
乃長，山靜色更好。路窮佳境出，人遠塵跡掃。木杪棲暮
霞，雲根被秋草。梵宮消歇餘，別室結構巧。道人謂余言，
寥闕非所寶。我忻得所止，彼此尚奚校。本心若困水，澄
湛勿敢撓。既放豈易求，唯靜乃能保。耳目各有官，外亂
中必擾。所接絕紛華，高明宜可造。至虛養吾全，有動中

其要學在謹操存寧復蘊神妙此山如有待履齒今始到歸來二三子不樂空自悼

蔣聲父和前韻後衆不果遷再用韻一首

山虛風擅秋林靜露涵曉樓居樂清淨簡冊肆探討豈云尚幽棲盍亦庶聞道跼然空谷音為發蘇門嘯黃花成久要紛披樹烟島落英入齒頰清風溢襟抱石間清芳泉可使顏色好南山有畸人閉戶獨却掃巾車招我來雲邊弄瑤草我將飛佩游誰構如簧巧爭夸魏有珠

不悟楚無寶子輿昔尚友從事犯不校一勺覆易空千
頃濁難撓是中存幾何胡乃不自保潤澤普沾濡小草
自膠擾君看擊海鵬霄壤隨所造車中有幾馬御者握
機要事如樞得環闔用皆妙顧茲天衢遙非可一蹴
到甚矣猶自欺卑哉亦堪悼

酬吳正傳一首

澱江揚清波秀氣產佳士學優言更卑神峻志無涖求
道本五經尚友論千禩文詞珠玉價璀璨光燄起焉能

遂倒瀾抱璞良有俟咸韶亂桑濮盆盎喜罍洗大道無
晦明斯人有臧否乾坤幹元化晝夜川逝水總總散萬
殊昭昭歸一揆巨細含分毫釐辨疑似是中有卓然
可變非至理從容適中和極樂非可以要須齊足目豈
必務口耳真積乃有功兩馬却成軌某也獨何人佔畢
聊復爾晡曉謬黑白前却昧所止輕塵棲弱羽簸蕩天
萬里日莫途且長心遠迹自邇佳篇出壯語三復興愧
耻古人各許可名實貴相擬汝南月旦評一言定非是

顧茲藐末材譽論何過侈神交居匪遙千里如一跬意
篤故不忘時能致雙鯉

五言律詩

莫春郊外一首

行行多勝事石竇濺流泉白鳥浮雲外青山落日邊風
平花委地野迥草連天春事成牢落人生一夢然

遯山先生挽詩一首

天假文章手家傳道義心錦標雲外夢紫綬日邊音玉

樹留春色甘棠鎖暮陰曾分上池水遺愛在人心

遊智者寺二首

風日景颼颼松陰繫紫騮白雲千載寺黃葉四山秋地
勝樓臺接林深虎豹遊人生自可樂此外復何求

梁朝舊蘭若雄據北山南衲子分諸榻詩翁老一龕登
臺生遠興引酒縱清談更有黃冠叟玄玄得共參

贈閒雲屋一首

聰明大顛老儒行墨其名傳道千燈續論文四座驚雲

和虛室白山與此心清禪味真堪悅何煩酒更傾

戲題智者法師所浴瓶

玻璃瓶也

膽瓶容七尺恍惚事非真至道元無相法身那有塵擊
牙知是妄題木即為神此老如堪起予言試一詢

次韻潘明之見勉之作

道邇師何在才疎學未傳白駒空永日華髮已流年彭
澤陶元亮南山孟浩然行藏無芥蒂秋水碧虛烟

蕭兄臨行索詩即席賦贈

相逢嗟久別歸路復匆匆我愧今原憲君非舊阿蒙山
風驚落木紅日數飛鴻舟颺西流水明朝定向東

次韻丘呂道三首

善人不可見弊帚直千金往聖困源在遺經旨趣深青
燈供夜讀黃卷對朝吟至道非難致危微在此心

久懷聲籍甚千里致雙魚宦路終推轂親闈且著書才
名賈太傅文學馬相如轍迹東循海何時適我閭

汲汲時能幾遽遽夢未醒自憐頭染白誰解眼垂青心

事沾泥絮生涯逐浪萍何人可私淑諸老漸凋零

金先生挽辭二首

德粹身常潤時艱志莫舒治安曾獻策私淑幸遺書方
寸涵千古襟懷湛太虛哲人今已矣吾道竟何如
統緒傳朱子困源繼魯翁誨人沛時雨對客藹春風志
立修身本誠存作聖功遺言猶在耳一慟閔幽宮

鄭夫人挽辭一首

早歲勤蘋藻中年賦柏舟諸孫昌義族一子祔靈丘貞

德晴空日浮生逝水漚白楊滿墟墓風動葉颼颼

已酉余年四十一首

白髮三千丈青春四十年兩牙搖欲落雙膝痺如攣強
仕非時彥無聞愧昔賢自期終見惡未忍捨遺編

花溪道中二首

板橋橫古渡村野帶平林野鴨寒塘靜山禽曉樹深雨
微風栗烈雲暗雪侵尋安道門前水清遊豈獨吟

天寒道路遠此去復何求適意真為樂浮生底用憂雲

容低野樹風力逆溪流喜見梅花笑相迎傍驛樓

浦川方仲觀入城從學繼入公門今歸侍親求詩
百里來為學違親半載餘暮雲飛故里秋露浥行車紅
葉蟬聲老黃花雁影疎漢朝尊吏事何必業詩書

秋夜二首

己酉

月落窓仍暗燈殘卷未收家人催杼柚穉子問更籌冷
露蟲專夜淒風樹怯秋百年一瞬目萬慮幾搔頭

志大空懷壁交疎少斷金半生成白首十載對青衿朝

市灰心久山林托興深紅塵多汨沒清夜幾沉吟

過太湖一首

周迴萬水入遠近數州環南極疑無地西浮直際山三江歸海表一徑界河間白浪秋風疾漁舟意尚閒

偕璉南城晚望二首

落日山川迥淒風鼓角收故攜童冠出來傍女墻遊橋柱鰲頭起沙汀燕尾流雲烟孤寺塔燈火萬家樓

荒草仍嘶馬微湍莫載舟目存皆絕景心遠豈窮幽北

顧思皇起南瞻憶沈侯會須擊刁斗踏月竟歸休

七言古詩

次韻鄭性之遊多寶寺一首

瞿曇雪山身幾年智慧兩足言因緣東周伯陽談道德
鈎竒探隱文五千江源濫觴委成海灌溉九土流潺湲
名山佳水占幾盡金碧突兀凌霞烟元和貞士掃糠粃
生辰月界箕斗躔口拊吭扼氣莫吐退則壺後行跋前
天文將喪鵬乃賦唐風竟靡鳳不翩北山雲仍嗜墳典

金剛經卷一
時被羽衣還逃禪寶山多寶信有得徐卿唱和佳篇連
空雲悠悠露山迥片石鑿鑿分泉涓畸人見詩思涉地
雜沓蠅紙相縈纏浮生每嘆虛過隙困學未足追逝川
卧遊條欵盡裨海長嘯白眼瞻青天

題延月樓一首

崦嵫稅駕紅塵息玉鏡飛空天地白嬋娟先得何處多
齊雲暈蒼高百尺清光無私照寰海舉頭千里明長在
主人欲擅四時秋夜夜掀簾為延待人生見月幾圓缺

今昔人殊同此月人迷夢覺月晦明終古相磨寧暫歇
倚欄清嘯酒莫遲銅壺催曉輪易歛

酬潘明之一首

在嘉興來招

華亭谷深紫烟濕老鶴唳空眼垂碧功名千歲衣染墨
遼陽骨換今幾日華表時來語消息九臯胎化頂朱丹
海門雲冷高飛難嚙然長鳴飲清湍何當天風吹羽翰
方壺圓嶠同盤桓

聞潘明之來錢唐因何先生行聊用寄懷 丁未

君不見絳侯木強尸相位問以錢數莫知對挈提綱維
振領要語言訥訥時稱治又不見弘羊平準容均輸秋
毫析判供主需當年英氣亦蓋世遺名身後今何如君
方小試居管庫褰衣始躡青雲路謹司出納人難能談
笑麾之有餘裕斧斤刀鋸各有執梓人中立一指顧道
傍腐鼠鳴鵩鴉原土荒叢走狐兔蠅頭微腥任逐逐石
峻泉清豈能汙仕優為學心更勤五車文字晨暮親置
身道義中尚友古天民志昂跡濡滯獨鶴游雞羣湖

光可人春事早六橋風暖多芳草馬蹄此日復追遊日
際白雲天尚杳輒憑故人問音信努力加餐為君道

題金月華藥物火候二圖

道涵萬物窮古今冲虛無象那可尋得之于心應于手
大地可使成黃金陰符立言始三百伯陽繼踵明至蹟
千篇萬論從此興直指真機二三策汞鉛龍虎皆假類
道妙先天本非器兔魚未得藉筌蹄圖上豈堪真索驥
赤城山人探天根微辭奧旨將淑人兩圖先後互體用

守中謂可存元神西南地暖生紫芝陽精夜夜臨虛危
相時發機奪天巧太阿凜凜宜堅持自昔聞之將脫屣
遽置彛倫恐非義羨君參透此玄關片言已泄師傳秘
須信天涯歧路多三千六百爭相訛

贈滕玄一首

庚戌

玄珠恍惚生秋水善守谷神寧不死虛中抱一求諸已
道不遠人應自邇負笈擔簦空萬里先生年來鬢已斑
對客時復談九還刀圭謂可回朱顏行滕纏足環塵闌

神仙豈必居三山

再贈江行父

予少多艱晚始知學獲登金仁翁先生之門雖
諄諄提耳而資品凡下放心莫開年來多病志
氣衰落無復世慮迺然有山林遁迹之興當代
君子人自為學求其趨同意合者蓋鮮行父此
來言論數日令人聳然豈惟趨同意合起我衰
落之志氣者多矣緬想先師潛焉出涕故于行

父之行再歌以贈之仲兄進脩精恪可以想見
其人亦以此為贄行父過蘭江遇舊交吳正傳
試一歌之正傳其為我有感

春風吹林兮集衆芳英華發兮朝生光元氣浩博兮不
可控搏觀有迹兮求無端八荒無垠兮同此天水之涘
兮山之巔貫金石兮遊魚鳶楫操舟兮輪行車事有幹
兮物有初沂流尋源兮合大同頑堅蘊璧兮琢與礱蘭
皋幽人兮芙蓉衣擿挾闢茸兮握要機交撞互擊兮聲

琅琅為我起舞兮毛髮張望吾師兮白雲鄉人其逝兮
涕泗滂有美人兮在天方羽翼短兮途路長胡不念我
兮歌斷腸

酬趙玉相併寄意方存雅一首

羸坑尺簡飛劫塵升堂絲竹故可溫前修垂訓淑後昆
歲月幾何浩無垠四列三條肇崑崙斬絕枝葉求本根
勿縱老眼迷紛紜榮觀燕處靜為君灌漑方寸融陽春
操觚染墨如有神洪流出峽萬里奔采掇奇巧務綴文

惟勤割穫慵耕耘茶蓼未薈空倉困浦陽山人嗜典墳
絕利應可求一源高談驚座雄波翻作詩來為洗睡昏
字字圓潔磨瑤琨平居却掃自掩門夜對膏火朝清曛
未契妙理泥語言雛鶴心遠身雞羣四十已矣真無聞
羨君仁里有隱淪清時尚復漁渭濱文詞落筆回千鈞
直與元氣相吐吞我鄉諸老名日湮歸然獨覩靈光存
如川趨海知所尊北顧每隔長山雲我有蘭艾沐且熏
何時一辨志可伸憑君為我言殷勤

遊龍回寺碧雲堂有何無適草書

蒼鱗作霖回壑裏竟化長岡飛不起何年老僧飛錫來
强架檐楹萬山底碧雲石梯如登天俯視竹樹行其巔
巖巒起伏呈怪狀壯若羣馬奔吾前何仙仙去不復返
滿壁龍蛇驚醉眼可憐一半委塗泥况復貼危混苔蘚
山翁摹搨妙入神永和繭紙且逼真勸君勿辭一日力
為我留為百世珍君不見二王舊帖皆殘編至今不惜
千金傳

次韻方存雅登八詠樓感舊一首

巧智相資外馳騫內殄為感黃金注靈明汙滓互翕張
地厚天高幾易處紫陽麗澤輝一時浙源遠合江東嫠
回視八表掃粃糠昭融千載披雲霧直從領下得明珠
驪龍睡目那能護鞭笞鸞鶴仙已歸步武室堂人亦去
先生聞道舊典刑筆下縱橫五花吐山林嘉遯名自隨
富貴浮雲行所素摛辭欲短子建牆博物猶窮陸機疏
來凭玄暢恍舊遊慨憶前題誰贊助平生喜識龐德公

况復長哦落霞句已降既見傾蓋親何用咨嗟歲年暮
簡編疑缺浩千萬憑藉先知為溫故微辭正欲辨白馬
古調寧惟聽朱鷺欽寄小徑勿敢遊且向康莊問人路
立秋日寄趙璉一首

蘭皋慘碧烟萋萋徘徊不忍竟與違欲窮目力望江水
江風故挾雙舟飛歸來復對唼唼者思才俯首西窻下
廐中駿足逐春風執策臨之盡幾馬拂硯挑燈披竹素
朝昏總是懷人處有時獨倚南面樓不見冥鴻北征路

題趙氏復墳詩卷

高岡擇地尋牛眠北山鑿石椁已堅百年丘隴豈易保
子孫為主須親賢眩人無父那知義族屬昏愚罔同利
大明疑有王為魚祇樹何辭金布地聞孫投牒情濃傷
青氈既復氣乃揚羨門荆棘為剪伐宰上拱木重生光
吁嗟長陵一抔土魂消骨化今何所寒食誰將飯一盂
枯柏蕭蕭泣愁雨

送方存雅遊永嘉

吳公父任永嘉文學約與同
往未幾公歿今自為此行

思遠樓前會昌湖花開十里紅芙蓉香消色盡水痕落
秋氣颯爽涵水壺巨鰲戴山兩歧出中江屹立雙浮屠
潮聲來往撞晝夜惴惴不敢鳴鐘魚雁峯南北揷雲漢
千尺亂削青珊瑚靈巖怪壑山鬼秘木屐齒敝終迷途
二蕩靈運所未見先生卧遊亦已久目擊自勝遙披圖
芹宮博士舊膠漆待瓜未熟行與俱絕絃掛劍歲月改
春風夢遠意竟孤竭來清興復未罷束書負爰爰載驅
永嘉輿學有祖述伊洛餘澤猶沾濡水心百年仰文獻

心齊一世稱範模詞章問學各有得耿耿輩出今豈無
搜羅人物覽世槩收拾佳趣歸奚奴平生遠遊有志願
局束不得為君徒待君捆載珠玉富敬誦想像聊為娛
送諸暨俞州判一首

北風蕭蕭吹江蘆清霜載道冰在鬚奚奴束書催上車
政成卷旆歸京都暨陽眇處天一隅里閭凋瘵煩爬梳
負戈攘臂衆暴寡探囊胠篋爭捐軀天民秉彜同好德
帶牛端為饑寒驅倅州寬惠別淑慝瘴惡豈必連妻孥

甘棠蔽芾有餘蔭百里寧謚無援枹存心忠孝本天性
為政固與常人殊壽昌自樂歸河中希文隱憂居江湖
白雲舍近畢至願青霄路迥寧躊躇前年螟旱遍八區
一夫不獲今豈無願君易地盡仁愛返淳敦俗需吾儒

馮公嶺一首

層巒疊嶂危相倚亂若飄風湧秋水寒松荒草間蒼黃
照眼崢嶸三十里初如井底觀空虛一峯巍然中獨尊
縈回百折至絕頂俯視衆嶺來兒孫人言此山插霄漢

馬不容鞭僕夫嘆攀援何異蜀道難氣竭神疲背流汗
熟視徐行路覺平心寬意適步更輕志須預定自遠到
世事豈得終無成我來正值窮冬月倚杖巖前嚼松雪
午店烟生野飯香陽坡日近梅花發寄語悠悠行路人
乾坤設險君勿嗔胸中芥蒂未盡去須信坦道多荆榛

題姑蘇臺一首

姑蘇城上姑蘇臺青山百里蛾眉開平郊如掌思清遠
昔人樂極曾生哀大讐未復敵不死壯志消磨後心起

會稽捷甲功自多種蠡深謀誠未已不知佳冶能傾國
暮暮朝朝醉春色勲臣抉眼視東門越女還為越人得
只今興廢總成空惟餘碧草搖淒風可憐千古臺前水
不洗當年甬東耻

雨華臺一首

大江斷後誰絕前右踞蒼虎龍左蟠英雄角逐三百載
庭花玉樹歌聲殘王氣消磨城郭改荒村古木棲寒烟
我來兩月不出戶登臺始覺天宇寬城中樓觀在井底

環視百里皆峯巒烈風拔樹雲蔽野飛電霹靂驅蜿蜒
虛亭坐視河海湧平地立見波濤翻天開翳掃羣響息
空翠削出滁和山陰陽雲雨反覆手向來喜懼誠無端
興亡世事亦如此俯仰千歲須臾間

春城晚步分我字一首

紅樓鼓歇烏輪墮淺水橫舟弄漁火春風生草雉堞青
隨處軟茵供小坐斷烟飛鳥入杳冥闌市行人競么麼
溪城斗大無遠趨因礙雲山環瑣瑣驂駟駕路或迷

蜩鶯槍枋闕非左歸同三子歌考槃茫茫宇宙誰知我

友人招飲榴花下一首

寧風惡雨消餘春春歸到處成清陰萬枝濃綠幻春色
絳葩丹蕊俄森森祝融行部過九地誤縱炬火燒園林
艷粧炙日色更好泠泠著雨紅尤深浩歌相對作痛飲
有花為伴非孤斟支頤半醉不成夢恍惚錯錯供微吟
只愁明日便搖落徘徊欲去還重臨會須秋風拆珠實
當載樽酒相追尋

七言律詩

送焦達夫一首

戊申

宦遊南土侍親闈
此日還鄉被綵衣
幾度論文方契合
一言話別忍相違
長風送棹江聲急
落日橫雲雁影微
水際梅花如舊識
冷容對客共依依

贈王斗山一首

骨肉斯文氣味投
春風芹藻憶同遊
故人別後無青眼
此日相逢笑白頭
匣劍光橫南斗夜
鳳梧陰冷峴山秋

惟應且試連鰲手未許江干下直鉤

謝趙肅甫遺著一首

天產瑰奇淮蔡鄉發揮倚數肇羲皇靈龜入地千年老
神艾當陽十尺長遠寄江湖憑驛騎喜歸蓬蓽對書牀
玩占從此無疑事感物思人意不忘

次韻潘明之易巾

巾陶思齋所製并戲之

漉酒當年制巧縫雲孫此日藝仍工接羅倒著情猶適
章甫從宜志未窮西漢神仙新事業前唐進士舊家風

自憐短帽無心整鏡裏愁看兩鬢髩

三月十五夜登迎華觀一首

夜深來此倚闌干千里樓臺俯首看月到中天花影正
露零平地草光寒氣清更覺山川近意遠從知宇宙寬
長嘯一聲雲外落幾家兒女夢初殘

青田大鶴洞一首

有葉法善試劍石舊有玄鶴
巢于上復有青牛在于下

榕影扶疎路九回仙家那復着塵埃山間田在牛終隱
石上巢空鶴不來丹竈無灰惟白草劍鋒有迹自蒼苔

洞中道士今何處
三扣雲關杳莫開

放棹行

安溪湖平行棹多黃頭
豎兒倚棹歌梅花照眼送寒色
酒暈着臉生春和炎涼
世態翻覆手江水長靜風吹波
出門一笑天萬里白鷗浩蕩如吾何

自飛霞觀登積穀山

癸丑

磨崖字古翳苔痕敗葉垂
蘿徑可捫靈運詩存池尚草
劉郎仙去洞無門潮來江濶
山風急日落雲橫海氣昏

欲望城中登絕頂腥羶觸目不堪論

自江心回復遊西山

才返中川一棹雲西巖無負此良辰紫芝峯下長松晚
綠野橋邊流水春竹杖持身行樂客桃花映臉醉歸人
道旁孝子何年墓宿草蕭蕭暗暮塵

西山萬象亭一首

亂峯盡處接浮雲東望悠悠萬事陳百里江流縈縞帶
滿城居室比魚鱗野僧倚竹嘯留客山鳥穿林啼喚人

落日亭中一杯酒何年復此對晴春

故宮一首

六朝城郭渺茫間南國重來築九關空恨赤龍潛越水
祇餘蒼隴對鍾山茂禾夾道秋風疾枯柳依牆落日閒
西關歸然尋丈地宮溝偃月共潺湲

九月十七日登清涼寺翠微亭故址一首

梵宇崢嶸枕石頭倚風極目立荒丘黃花覆地初經雨
白雁橫雲帶遠秋城郭已非山故在江淮失險水空流

衲僧八十仍多病
技淚殷勤說故侯

春夜次韻二首

饑鳥驚鵲起南枝
夢入槐柯覺亦悲
花裏樓臺春到早
竹間窓戶月來遲
篝熏翠被爐存火
燈落紅星硯汗池
可惜風光半塵土
明朝火急報君知

兩部蛙聲似打衙
披衣清坐厭紛譁
門同靖節日長閑
家近相如意可賒
低幕風生翻宿燕
小簷雨歇落輕花
玉琴聲斷尋幽夢
回首西窓月未斜

送余之問赴烏臺一首

江南佳麗萃金陵
早歲遊觀壯氣伸
月旦當年曾許子
平原今日正須人
鷹鷂得志三秋翮
鴻雁隨陽萬里身
入手功名便回首
白雲深處有鱸蓴

次韻子昭

經德無回貴自持
人心未信肯天欺
終期辭貨規楊震
未必償金汙不疑
卉霜零知勁草健
翎風薄寄深枝
公庭事簡多休沐
舉案同吟四牡詩

次韻王中齋登拱翠樓詩

曾醉危樓坐石坡彈箏擊缶醉婆娑
蓬飛已改流年鬢木老猶存舊日柯
紅樹參差秋水遠碧山高下夕陽多
此時還縱西風眼共倚闌干起浩歌

秋暮有懷

十二闌干倚翠微露華寒重逼羅衣
碧天連水思空遠衰草滿庭人未歸
秋雨樓臺幾寂寞春風院落自芳菲
冥鴻應有青霄侶為隔閒雲尚獨飛

次韻王景元春暮

茂林陰裏據胡床，賸喜天然密幄張。
水覆落花紅浪遠，壟翻秀麥翠雲長。
春塘絮盡風無力，曉樹枝明露有光。
隨分眼前生意足，對窓野草發幽香。

寄許克勤一首

小窓燈火對絃歌，探賸鉤玄義不頗。
有志定須搏北海，離羣應是老西河。
雲翻雨覆交情薄，瀾靡波頽末學多。
清夜沉吟正相憶，柯山月落碧峯峩。

七言絕句

卽席用蘇世賢韻送郭子昭三首

攬轡春風入駿蹄
兩堤烟柳護晴溪
黃鶯自有留人意
相對殘紅不忍啼

數載燈窓筆硯親
往來問字不辭頻
于今便有雲泥隔
折柳亭前又送人

落花高下弄菲菲
多少離愁付笛吹
別後故人休忘却
與君重賦渭城詩

社日一首

秋豚已腍野雞肥
笑對西風把酒卮
有耳厭聽塵裏事
任教聾聵不須治

哭空谷師三首

甘棠遺裔繼高陽
衣染緇塵樂法王
四十七年成大夢
那知今度夢尤長

玄雁離羣得意飛
稻梁秋靜羽毛微
不知何處逢繒繳
雲冷空江夜不歸

霜入楓林葉已丹
風鳴籟動助悲酸
山人歸去鶴空怨
清夜月高榕影寒

次韻潘明之秋思二首

西風冉冉鬢毛侵
鳳老梧衰鎖夕陰
倚遍闌干重回首
斷鴻千里暮雲深

靈槎夢徹漏聲殘
河漢無雲動碧瀾
閭闔班齊香案近
天衢月白露華寒

舟中贈璉一首

行人流水共悠悠
雨灑溪風萬點愁
別棹不來天欲暮
倚絃無語看浮漚

過西湖一首

不見湖光十五年
滿堤烟雨復垂船
蕩荷岸柳渾依舊
鬢上星星只自憐

夜過黃泥渡一首

夜深風息水安流
白雁黃蘆滿眼秋
行李蕭蕭官棹穩
卧看明月過真州

白雲集卷一